

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին 14.03.2023թ. թիվ 2316067618 որոշումն անփոփոխ, իսկ վարչական բողոքներն առանց բավարարման թողնելու մասին

<< 05 >> 04 2023թ. 7-13 - 3149

ք.Երևան

Ճանապարհային ոստիկանության պետ, ոստիկանության գնդապետ Ն.Սարգսյանս, վերանայելով Լաուրա Խաչատրյանի ՄԴ/19067-23 և ՄԴ/19959-23 դիմումների քննարկման արդյունքում ստեղծված նյութերը՝

Պ Ա Ր Զ Ե Ց Ի

Քաղաքացի Լաուրա Խաչատրյանը(ծանուցման հասցե՝ քաղաք Երևան, Կենտրոն վարչական շրջան, Դեմիրճյան փողոց, 38-րդ շենք, 20-րդ բնակարան) դիմումներով խնդրում է վերանայել Ճանապարհային ոստիկանության վարչական տույժ նշանակելու մասին թիվ 2316067618 որոշումը՝ նշելով, որ համաձայն չէ որոշման հետ, վկայակոչելով մի շարք օրենքներ և խնդրում է բողոքը քննել առանց իր մասնակցության:

Դիմումների քննարկման արդյունքում պարզվել է, որ թիվ 2316067618 որոշումը ենթակա չէ բեկանման հետևյալ պատճառաբանությամբ.

<<Տեսանկարահանող կամ լուսանկարահանող սարքերով հայտնաբերված ճանապարհային երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին>> օրենքի 3-րդ հոդվածի 1-ին մասի համաձայն՝ վարչական վարույթի իրավախախտման հատկանիշների պարզման փուլում իրավախախտումը հիմնավորող ապացույցը իրավախախտումն ամրագրած տեսանյութն է կամ լուսանկարը, որը պարունակում է նաև տեխնիկական միջոցով արձանագրված տվյալները: Ըստ նույն հոդվածի 2-րդ մասի՝ որպես իրավախախտումը հիմնավորող ապացույց վարչական կամ դատական կարգով բողոքարկման վարույթում կարող են օգտագործվել Վարչական իրավախախտումների վերաբերյալ Հայաստանի Հանրապետության օրենսգրքի 251-րդ հոդվածով նախատեսված ապացույցները:

Վարչական իրավախախտումների վերաբերյալ ՀՀ օրենսգրքի 251-րդ հոդվածի 1-ին մասի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ: Ըստ նույն հոդվածի 2-րդ մասի՝ այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության ենթարկվող անձի բացատրություններով, տուժողի, վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

Ճանապարհային ոստիկանության Ճանապարհային երթևեկության կազմակերպման հսկողության բաժնի 28.03.2023թ. տեղեկանքի համաձայն, Երևան քաղաքի Մաշտոցի

պողոտա-Իսահակյան փողոց խաչմերուկի հատվածում, մասնավորապես իրավախախտումը կատարած վայրում, ՀՀ կառավարության 26.10.2006թ. թիվ 1699-Ն որոշման պահանջներին համապատասխան և երթևեկության մասնակիցներին տեսանելի վայրում տեղադրված է **5.15.1՝** <<Երթևեկության ուղղությունները գոտիներով>> ճանապարհային նշան, ըստ որի ձախ եզրային գոտուց թույլատրվում է երթևեկել միայն դեպի ձախ, իսկ աջ եզրային գոտուց ուղիղ կամ դեպի աջ:

Միաժամանակ տեղեկացվում է, որ իրավախախտման օրվա դրությամբ վերը նշված ճանապարհային նշանը չի բացակայել և եղել է երթևեկության մասնակիցներին տեսանելի:

ՀՀ կառավարության <<Ճանապարհային երթևեկության կանոնները և տրանսպորտային միջոցների շահագործումն արգելող անսարքությունների ու պայմանների ցանկը սահմանելու մասին>> 28.06.2007թ. թիվ 955-Ն որոշման 51-րդ կետի համաձայն՝ ոչ ռեխագնաց տրանսպորտային միջոցների համար երթևեկության գոտիների քանակը որոշվում է գծանշմամբ և (կամ) 5.15.1՝ «Երթևեկության ուղղությունները գոտիներով», 5.15.2՝ «Երթևեկության ուղղությունները գոտիով», 5.15.7՝ «Երթևեկության ուղղությունը գոտիներով» և 5.15.8 «Գոտիների քանակը» նշաններով, իսկ եթե դրանք բացակայում են, ապա վարորդների կողմից՝ հաշվի առնելով երթևեկելի մասի լայնությունը, տրանսպորտային միջոցների եզրաչափերը և դրանց միջև անհրաժեշտ միջկողային տարածությունը:

Մասնավորապես 5.15.1՝ <<Երթևեկության ուղղությունները գոտիներով>> ճանապարհային նշանը ցույց է տալիս գոտիների թիվը և երթևեկության թույլատրելի ուղղությունները՝ դրանցից յուրաքանչյուրով:

Վարչական իրավախախտումների վերաբերյալ ՀՀ օրենսգրքի 124-րդ հոդվածի 1-ին մասի համաձայն՝ տրանսպորտային միջոցների վարորդների կողմից ճանապարհային նշանների կամ ճանապարհային գծանշումների պահանջները չկատարելը՝ առաջացնում է տուգանքի նշանակում՝ սահմանված նվազագույն աշխատավարձի հնգապատիկի չափով:

Վարչական իրավախախտումների վերաբերյալ ՀՀ օրենսգրքի 124-րդ հոդվածի 36-րդ մասի համաձայն՝ ճանապարհային նշանների պահանջները չկատարելու համար սույն հոդվածի 1-ին մասով նախատեսված վարչական իրավախախտումն ունի նվազ նշանակություն այն դեպքում, երբ իրավախախտումն անխուսափելիորեն կատարվել է երթևեկության այլ մասնակցի գործողության կամ անգործության պատճառով:

Ճանապարհային ոստիկանության վարչական տույժ նշանակելու մասին թիվ 2316067618 որոշման իրավախախտումն ամրագրած տեսանյութի մանրակրկիտ ուսումնասիրությամբ հիմնավորվել է, որ վարչական տույժ նշանակելու մասին վերը նշված որոշումը ենթակա է կատարման, քանի որ դիմումատուի <<FORD>> մակնիշի 10ZA808 հաշվառման համարանիշի տրանսպորտային միջոցը 24.02.2023թ-ին ժամը՝ 18:17-ին, Երևան քաղաքի Մաշտոցի պողոտա-Իսահակյան փողոց խաչմերուկում միայն դեպի ձախ թույլատրող երթևեկության գոտուց երթևեկել է ուղիղ, ինչն անխուսափելիորեն չի կատարվել երթևեկության այլ մասնակցի գործողության կամ անգործության պատճառով, հետևաբար թույլ է տվել Վարչական իրավախախտումների վերաբերյալ ՀՀ օրենսգրքի 124-րդ հոդվածի 1-ին մասով իրավախախտում:

Անդրադառնալով դիմումատուի պնդմանը, որ վերը նշված որոշումը կայացնելիս հարուցված վարչական վարույթի մասին պատշաճ ձևով վարույթի մասնակիցները չեն ծանուցվել, ապա <<Տեսանկարահանող կամ լուսանկարահանող սարքերով հայտնաբերված ճանապարհային

երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին»>> օրենքի 5-րդ հոդվածի համաձայն՝ վարչական վարույթը բաղկացած է իրավախախտման հատկանիշների պարզման և վարչական ակտի ընդունման փուլերից: Նշվածից ակնհայտ է, որ բացակայում է ընթացիկ՝ այն է, անձին լսելու փուլը, որի ընթացքում վարչական պատասխանատվության ենթարկվող անձը իրավունք ունի ծանոթանալու գործի նյութերին, բացատրություններ տալու, ապացույցներ ներկայացնելու և այլն:

Միայն բողոքարկման փուլում է հնարավոր վարույթի մասնակիցներին և նրանց նարկայացուցիչներին հնարավորություն տալ արտահայտվելու վարչական վարույթում քննարկվող փաստական հանգամանքների վերաբերյալ, ներկայացնելու ապացույցներ և այլն:

Վարչական վարույթի ընթացքում հիմնավորվել է, որ **5.15.1՝** <<երթևեկության ուղղությունները գոտիներով>> ճանապարհային նշանը տեղադրված է ՀՀ կառավարության 26.10.2006թ. թիվ 1699-Ն որոշման պահանջներին համապատասխան և երթևեկության մասնակիցներին տեսանելի վայրում, ինչը համապատասխանում է դիմումատուի կողմից վկայակոչված ՄԱԿ-ի կողմից 08.11.1968թ. Վիենայում ընդունված <<Ճանապարհային երթևեկության մասին>> Կոնվենցիայի 4-րդ հոդվածի <Ա> կետին:

Այսպիսով հիմնավորվել է, որ դիմումատուին վարչական պատասխանատվության ենթարկելու մասին վերը նշված որոշումն իրավաչափ է և օրինական:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին 14.03.2023թ. թիվ 2316067618 որոշումը թողնել անփոփոխ, իսկ վարչական բողոքներն առանց բավարարման.
2. Սույն որոշումն ուժի մեջ է մտնում հանձնելու օրվա հաջորդող օրը և կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում.
3. Սույն որոշման օրինակն ուղարկել Լաուրա Խաչատրյանին:

Կատարող՝ Հ.Կարապետյան
Հեռ. 011544783



Ն.Սարգսյան